

四庫全書

集部

欽定四庫全書

石倉歷代詩選卷四百七十八

明 曹學佺 編

明詩次集一百十二

徐禎卿

字昌穀  
吳縣人

遊俠篇

四牡服朱軒俠氣何翩翩  
夕鷺邯鄲道朝馳函谷關  
千金飾冠劍寶服芳且鮮  
徒御若雲浮周道直如弦  
堂中養死

士被服皆珠紈櫪馬厭梁肉貝甲委如山片言傾五嶽萬乘  
慕其賢諸侯奉白璧為壽卮酒前合從連趙魏駕轂出齊燕  
仗劍歸質子矯節奪兵權皦皦日中議軟血重一言難鳴脫  
虎口狗盜乃獲全天地相盪蝕四海如沸淵憑軾一抵掌解  
紛談笑間縱橫負奇節逸氣蓋八埏慨慷功名會何言七  
尺捐策勲山河溢流光竹帛鐫何為坎壈士撫劍獨長歎  
學謝靈運賦華子岡詩贈趙建昌

朱戀蔚靈輿雲海互盤旋陰霞絢石室夾篠蔽清漣翠

羽紛啁哢瓊藥合芬妍桂嶺屯蒼靄桃蹊迷紫煙朝登  
郡樓望佳氣鬱蔥芊挹景企嘉客臨風懷羽仙冥賞非  
偶愜神理豈虛傳建德寡民務山水發清絃順性奚矯  
迹知道在忘筌非君秉淵尚茲理誰為宣

王敬止御史始竄海南繼移永嘉今自燕中迎  
養

珠厓昔長竄連州始量移借問東甌土如何南海湄霞  
標建台嶽桃源帶武夷鴈山榮桂樹象浦合珠漪玉璫

非一族海錯被珍奇金盤湛碧露黃柑滿綠枝歡此三  
春日復愜暮秋時鳴琴坐高館撫景臨華池迎輿侍潘  
令進酒舞萊兒顧以今時笑還瞻昔朝離豐澤亨雷雨  
瑤草變芳蕤永嘉多懋宰建德易絃絲昔慕文翁化今  
蒙葉尹慈長沙非舊謫宣室契前思光華冀一接胡越  
詎能追河東欲有獻及此汾陰祠

在武昌作

洞庭木葉下瀟湘秋欲生高齋今夜雨獨卧武昌城重

以桑梓念淒其江漢情不知天外鴈何事樂南征

登半塘寺閣

夙有山水慕苦為形役拘澹茲夏日永聊得狎浮圖攀  
雲凌廣閣靄靄見吳都諸川散林上平野鬱芬敷法花  
垂縹緲晴采動虛無煙火下方雜昏明時態殊境超自  
生樂疲心忽重蘇因傷人世子擾擾即長途

送友

瓜生葛薪下緣蔓義相因人生結交故婉孌自諸親交

義諒不遠戚若同株根勿采棘下瓜棘傷多苦辛不惜  
傷者苦但恐株芟分念當與子別惻惻傷我神

留別都城諸同志

客有悽悽者三年歌式微竭來事原隰經返舊園扉昔  
往被冬裘今還服春衣撫景雖云愜中歡慙以違出門  
見芳草念子忽如饑

送邊子出刺衛輝

平生歡愛日履坦昧前艱及爾嚴霜集方知末路難疇

昔同棲翮毛羽各摧殘  
顧影惟爾我憾憾傷心肝

二

我私何悠悠薄送遵垆丘  
朔野曠無人樹木鳴颼颼  
登高望衛邑思見漕衛流  
前景奄忽匿浮雲蔽行輶

送范靜之遷威州

吾憐范巨卿惆悵不邀名  
作吏竹林下清風訟獄平  
與君同得罪獨竄夜郎城  
萬里巴江水相思猿狄鳴

送唐季和謫穀城



襄陽千里道念爾一杯辭上馬山公醉膏騰倒接羅回  
風漂朔野飛雪繞旌旗及此下車日黃河水泮時江喧  
神女館花發峴山祠莫謂長沙謫風流良在茲

貽吳叟

鬱彼丘園叟居然松竹姿生涯隔城郭流水到茅茨乃  
識堯仁大誰言靜者私中山多法酒高會及良時歲月  
老將至耕桑日在茲鹿門姻婭地從此接龐眉

懷往

昔我逢休景結交共雲翔秦客穆修矩魯生蔚令章同  
聲展言笑四座發芬芳北牖湛清酒明月出西方廣署  
滅流塵蘭燈揚朱光極意連篇翰良夜殊未央歡宴豐  
時豫千秋焉可忘流光一朝絕撫膺增慨慷

其二

穴蟲測序改客鳥知時宴嚴風振中野凝霜薄飛觀塞  
裳啟東戶河星出有燦耿耿不遑寐沈思汨回亂何以  
終遙夕明燈且濡翰自我違之子苑藻絕流玩郢斤不

存目流俗恥堊墁塊處空堂中誰為發言粲感慨申微  
詞佇立倚長嘆

雨霽庭藥芬郁

炎曦代暮節潯景布萋陰迎風抗高館疏牖匝重林百  
卉熙嘉月洽土重豐霖中庭始及霽芳蕤忽以森即事  
寡喧垢投足類幽深朝藝植余杖時還散我襟處世常  
希寂委順故怡心何必東山下考槃始投簪

五月五日

怡悅經故園芳菲值良節風俗猶自存念我久離別葵  
榴綴時穠蒲荷散幽列莫謂暄景滋湘江坐鳴鳩

對月有懷

夜氣泛虛爽灘聲來自遲繫舟南斗下玩月西江湄對  
酒忽不御茫然空爾思

江夏題王守城南精舍

林步不覺遠溪流隨興長悠然深竹裏獨往綠蘿莊山  
色佳南郭平疇連北堂野人來荷鋤蠶月百草芳寤悵

白雲賞載謠叢桂章垂楊足池鯉閑牖有壺觴念此牽  
情性何勞緇素裳

題潘進士贈謝昌邑雪山圖

誰謂咫尺勢宛如觀九疑狂風吹白雪片片落天池雲  
氣遶半壁煙光昏四維髣髴湘君廟如聞猿狖悲颯沓  
凌冬樹點綴有餘姿楚客善毫素游宴人未知北窗遇  
陶令大醉雪寒時凍灑丹青筆長歌歸去詞他日看圖  
畫難忘剡水思

與江夏尹餞于舍人于黃鶴樓

未有干戈地能令棟宇全  
乾坤餘壯觀荆楚鬱山川  
鶴唳寥天迥江深禹廟前  
舟檣控南北節鎮此旬宣  
令尹乘時暇使君同祖筵  
炎蒸飄不到虛爽境何偏  
乃繼登臨跡空懷作者賢  
風煙一回首今古共淒然  
握手將安適經秋未擬旋  
迢迢沙際月遙憶桂陽船

白紵歌

三星爍爍花滿堂素腕盈盈出洞房  
垂羅映縠耀明妝

皦若雲中開月光流情盼君君莫忘停歌節舞進玉觴  
願君安坐夜未央

其二

中庭桃枝連理傾瓊卮含霞玉醴盈歌舞君前流目成  
絲桐順耳感人情持觴把袂君不違願作梁間雙燕飛

石川子歌

石川子隱於魯門之西長牽青牛飲素溪有時駕之驂  
文狸驂文狸乃至岱宗之巔弱水之湄石門迢迢上通

天玉京金闕光陸離過謁泰山君道逢赤松師授以長  
生說鍊氣服食除三尸青泥丹鼎子善治玉梓化日如  
相贈共爾商山歌紫芝

贈王淵之

君不見十月狂風吹白雪長安城中地欲裂朱門酒爐  
紅炙天空裏瓊花旋消滅由來都國盛繁華青雲絡繹  
滿仙車浪說黃金賜寒士爭言白璧謁侯家驕矜意氣  
遙相羨片善朝推蒙夕薦待詔虛沉金馬門傳宣直上



麒麟殿王郎濩落爾何求千里乘驢被黑裘空論作賦  
稱才子未肯低眉事貴游知君不得逢揚意終愧明時  
老督郵

送士選侍御

壯士樂長征門前邊馬鳴春風三月柳吹暗大同城蘆  
溝橋下東流水故人一樽情未已胡天飛盡隴頭雲唯  
見居庸暮山紫羨君鞍馬速流星予亦孤帆下洞庭塞  
北荆南心萬里佩刀長揖向都亭

送王誕敷之官長沙

美人南往雲陽墟我欲從之道鬱紆  
晝夢衡峰半空紫  
覺來失卻巴陵湖對君把酒心茫然  
七十二峰猶眼前  
玄猿攀蘿石壁仄黃鶴空洲芳草連  
春寒風多太陰黑  
瀟湘淋漓濕雲色楚宮花木啼杜鵑  
舟子商人淚橫臆  
君欲去兮可奈何側知王事難蹉跎  
離心不惜瑤華贈  
聊學湘纍誦九歌

送友

平原蒼蒼孟冬月行子辭燕指吳越淮水橋邊賣酒家  
停車幾處梅花發羨爾侯門早拂衣柴桑舊里角巾歸  
白酒山中新芋熟青楓江上蟹螯肥閉門松竹依然在  
一曲參差醉落暉

寄華玉

去歲君為薊門客燕山雪暗秦雲白馬上相逢脫紫貂  
朝回沽酒城南陌燕山此日雪雰雰祇見秦雲不見君  
胡天白鴈南飛盡千里相思那得聞

觀唐生寄贈子容洞庭山圖因求作廬山障子  
丹巒氤氲拂空起素鍊平鋪洞庭水迴谿笑指毛公家  
忘却滄溟幾千里我隔廬峰夢紫煙常騎白鹿上青天  
煩君貌出仙人障西寄長安向日邊

王昭君

金裝嬌玉驄結束事和我獨去白雲道遙將黃鵠同紫  
臺留漢月青塚落胡空萬里琵琶曲流悲入漢宮

彭象

茫茫彭蠡口隱隱鄱陽岑地湧三辰動江連九派深揚  
舲武昌客發興豫章吟不見垂綸叟煙波空我心

登支硎山樓遲游侶

谷寺憐幽密茲樓表麗觀煙雲塞壑動竹樹入門寒獨  
往迷前徑憑高遲所歡時聞有清磬遙出暮林端

吳舍人園亭

新年風景地休沐竹林人魚藻含泉動楊園聽鳥新夕  
陰連九陌喬木俯千鄰虛負高陽興多慚酌酊身

長陵西望秦陵

新宮猶藹藹  
白露已蒼蒼  
詎識神靈遠  
徒悲劍舄藏  
陰風振大漠  
落日照漁陽  
稽手攀松柏  
雲天灑淚長

二

昔送宮車出  
長悲西雍門  
今來寒食節  
獨望灞陵園  
杳杳仙城閉  
萋萋封樹繁  
當時侍從客  
慟哭幾人存

秋日過故尚書吳公池館二首

平泉舊時里  
秋日水亭開  
苑樹澗陰合  
魚梁山照來  
野

人臨逸釣公子進新醅興盡何須謝垂鞭醉即回

其二

不見尚書履階陰空綠苔菊荒三徑在棗熟衆禽來跡  
為憐幽駐圖因好事開秋風懸劍處落日首重回

嘉禾道中

檣李城何在瀟條草樹存未醒吳苑酒已動越鄉魂問  
水來天目看桑過石門愁聞鵲鵲語寧聽楚山猿

浙江驛下作

自嘆南浮客崎嶇驛嶺遙川途澹斜日戍鼓遠揚橈目  
勢含滄海山形折落潮夷墟不可問徒使旅心搖

過黎雲精舍

遠師耽宴寂跌坐石牀深留客開香積談玄就竹林煙  
藤結暝翠雲磬下空音淨現青蓮色懸知出世心

送許補之還丹徒

憐君揮手去匹馬向南天旅病青山外鄉心落日懸燕  
關變積雪淮柳動新煙驛路重雲裏相思易隔年



送友人還吳

陽月隨陽鴈，遙從塞上來。  
北人江北望，不見隴頭梅。  
坐看楊花飛，淚吟為莊舄。  
哀歌傳數行，札千里送君回。

駕出南郊退簡邊喬二太常

齋殿鑾輿下，郊宮鳳野開。  
霜戈迎日動，芝蓋拂雲來。  
輦道前旌直，鈞陳翼騎迴。  
甘泉枚朔侍，詞賦接仙才。

秋日懷李郎中及邊熊二君子

秋興因高賦，雄才憶省郎。  
山川思不極，雲樹莽蒼蒼。  
對

酒知時變看花恨別長如何霜後鴈猶未達瀟湘

寄子容

芳月高堂宴辭君楚水游那知臨歲晚猶此對滄洲  
津暖空雲度江明霽雪浮新詩仍自惜何以慰離憂

月

故園今夜月迢遞向人明只自懸清漢那知隔鳳城  
氣兼風露發光逼曙烏驚何事江山外能催白髮生

又

落日桃源口迢迢望楚邦煙霏靜夜色棹響繞空江看  
月生西浦穿雲度北窗高樓有羈羽照影不成雙

贈張注先生

蚤得投簪理緬欽遺俗情丘園白日靜眉宇紫芝明上  
德綏多祉賢孫復令名道全身愈泰慮澹物俱輕壽酒  
山人勸柴車縣尹迎坐臨冲逸境於此學無生

靈隱寺贈靜公

聞有千年寺長松信許深冲虛半樓閣落日更登臨舟

櫺窗中小藤蘿天際陰江流明暮靄石澗響空林蟠據  
雄都會風煙異古今幽真余有慕詩義爾能尋雲翼無  
言健淵魚本自沉終期白蓮社來就玉山岑

各賦隱士得魏仲先贈金陵顧徵士

何處蓬山宅汾陰傍漢宮冥棲紫芝客長嘯綠雲中忽  
佇甘泉駕遙尋河上公玄風那可掇大道本難窮夫子  
金陵隱心將靜者同瓊枝無以獻歌此寄喬嵩

謁嚴子陵祠

言訪羊裘隱荒臺迹宛然巖崖祠屋綴天漢客星懸伊  
昔風雲感丘園束帛弔神龍不可係造化獨深全去矣  
孤蹤邈懷哉大澤偏釣竿何嫋嫋石瀨故濺濺郡以高  
名著山依汗簡傳餘風猶激懦聖代更招賢圭組誰憐  
辱襟期本尚玄終焉赴空谷寤寐白駒篇

廬山

豫章山水郡廬嶽此深蟠吳楚開雄鎮東南表巨觀中  
天浮黛色百里暖晴巒漸近雲消豁俄驚勢鬱盤錦屏

圍合沓玉笋屢叢攢詰曲羣形變登臨萬象寬風高六月  
電氣慄九江寒石鏡明花外香爐出霧端劍芒遙矗  
矗龍脈故九九瑤草幽難掇青蓮秀可餐赤城虛瀑布  
彭蠡更波瀾禹跡于茲盛崇功振古刊壯懷凌絕頂倦  
鳥息飛翰霄漢心何有沈冥性所歡將修梵門術欲上  
羽人壇淨社花垂白名巖竈覆丹昔賢非不達於道自  
相安愛勝真忘返遺榮亦未難聊須偃松竹遂可掛纓  
冠祇為懷佳侶淹留獨寤歎

於武昌懷獻吉五十韻

豈是乘桴客棲棲鄂水陽  
故人多放斥吾道轉淒涼  
寵辱今如此沈憂不可忘  
隋珠元按劍荆璞自離殃  
似爾青雲器誰言世網傷  
王風紛墜地冥契獨升堂  
逸擬曹劉駕清聯沈謝行  
列星分漢署白雪映仙郎  
能使尚書重深揚國士光  
在公勤夙夜於古準羔羊  
側席遭仁聖求言渴禹湯  
靡躬懷骨鯁有疏削豺狼  
那信黃金鑠萋然貝錦張  
孤誠迴日月萬死出風霜  
直道焉辭辱庸夫

或笑狂始知天德廣曲納海流長賈誼猶投楚鄒生故  
泣梁如何捐虎口忽已訝雲翔我識從偕計觀風美大  
唐謬通仙藉末賜對玉墀傍食粟真為竊河清詎有常  
寧論供黼黻祇爾奉趨蹌乃邁同心彥陪游古藝場夜  
閒堪秉燭日旰尚含香莫逆談恒劇從容寢不遑允求  
諧比興端可發宮商疏越宜宗廟華蟲傍袞裳淵衷深  
禮樂文化蔚巖廊豈謂奄徂落還應厭治康雙傾泰陵  
淚俱斷杞人腸赤子居猶喘蒼天意巨量河山開紫氣



符瑞轉宏綱漸歷輿圖遠欣瞻帝座昌聲名掃烏谷英  
德邁龍驤姬旦匡周室相如侍武皇俄看霾霧鬱半覺  
老成亡鱗逆攫須斃乾行斷自剛內林鷗啄吻丹闕隼  
浮芒逐客無寧跡窮途不裹糧厲堦生枳棘芬餌挂鸞  
凰西去仍秦苑南歸定汴鄉驚飛憐帶繳欲往歎迷方  
憶向青門別重凋季月芳幾時申契闊繇此卜行藏太  
潔為身累虛名與世妨悲歌空翫髒中路惜徬徨潛伺  
亨陽復終焉履善祥達人聊麴蘖隱士且庚桑鴻鴈紆

關塞江流極楚湘遙知懷逐侶一為奠椒漿

與太學諸僚宴集

藝苑開三徑閒僚散竹林絃歌一以暇春服共相尋  
薄采漪皇澤臨風款道襟高梧無雜蔓呦鹿有佳音  
藉草時傾酒披衣或鼓琴何妨慚黠也吾醉獨狂吟

題唐氏園池

堂上琴書暇名園愜宴游綠陰交樹石白水散田疇  
林步常驚鳥沙眠且狎鷗開軒桑柘接當徑草花幽野老

時相過村醪擬共酬陶然菊松下乘興足淹留

瞻文溫州畫像

浮生此世隔過位恍然疑直訝風雲動俄驚泰華墮巖  
廊不可起英爽儼如遺白首通羣略雄才沮一麾徒教  
涕泗闊共惜羽毛遲堂几蕭蕭在丹青漠漠垂典刑歸  
此老江海寄餘思有忝吹噓力無忘沃醑辭風煙久搖  
落魂氣欲何之躑躅庭除下伸衷托短詩

晚過獻吉齋所

端居聞子肅清修吏散鴉啼省署幽芳草不知人獨往  
空山何意鳥相求開軒歷歷明星夕隱几蕭蕭古木秋  
自惜風塵堪吏隱浮生莫遣有離憂

送耿晦之守湖州

遠下吳江向雪川秋高風物倍澄鮮鷓鴣菰蒲翠相亂  
錦石游鱗清可憐郵渚撾頻津吏鼓漁歌唱近使君船  
吳興峴山足勝事漢水襄陽空昔賢

贈別獻吉

爾放金雞別帝鄉何如李白在潯陽日暮經過燕趙客  
解裘同醉酒鑪傍徘徊桂樹涼颼發仰視明河秋夜長  
此去梁園逢雨雪知予遙度赤城梁

送廬陵楊二尹

何卑執戟謝京華却愛河陽縣裏花不為遠師招白社  
擬從勾令覓丹砂青天挂席浮明月螺水迴舟勝若耶  
莫學南昌隱君子離羣應拂五雲車

送盛斯徵赴長沙

昔愁越雋千峰仄轉入巴渝萬里賒豈料聖恩憐賈誼  
猶煩郡佐出長沙蠻中瘴遠三湘水江畔春逢十月花  
遙聽岳陽樓上笛可能回首憶京華

寄獻吉

昔聞已卜扶溝廬為復還從河上居嵩雲落日迥在眼  
鼉沫蛟渦愁故墟一探那傳少陵淚經年不見茂先書  
荒村豺虎眠難穩好共滄江學釣魚

感興懷獻吉

客舍秋風動客哀  
殘花秋日伴殘杯  
虛名久愧為身累  
白眼那能免物猜  
落魄京華空老大  
旅魂江漢好歸來  
山川矯首浮雲迥  
倚杖遙登何處臺

聞庭實上計不與悵然有懷

軺車十月四方來  
奈爾辭天獨未回  
遠在荆南淹蜀盜  
祇從極北望燕臺  
子山涕淚秋難盡  
杜甫干戈老更催  
牢落梅花江閣迥  
肯拚碁局負深杯

寄杭東卿

西湖十月煙水平梅花參差千樹明  
越王城畔氣應早  
林逋宅邊江更清  
驛使章臺空寄別  
霜天玉笛暗沾纓  
故人若有揚州興  
爲聽春鴻白雪聲

沅溪潘進士在長安逆旅中見庭下山丹花詰

其云是沅中移來感而賦詩命予嗣響

故苑花空發他鄉鶯自啼  
主人孤館裏斜日楚雲西

月軒

石室月已滿青林人未眠  
向月步溪水白雲遙在天



擬古宮詞

興慶池頭漏未闌  
梨園弟子曲將殘  
花前更進涼州伎  
無那西宮月色寒

狗監離宮承宴歡  
掖庭通曉不迴鑾  
那能夜夜長門裏  
銀燭薰衣待漏殘

送顧馬湖孔昭

巴東明月巴西歌  
兩岸梅花羌笛多  
一曲停橈雙淚落  
猿聲三峽若為過

安南歌送沈使君

借問炎交路若何  
片帆南指廣州過  
知君怕見桄榔樹  
近嶺猿聲日漸多

烏蠻灘上煙水聲  
伏波廟前秋月明  
夜半津人挽舟上  
夷歌偏動望鄉情



石倉歷代詩選卷四百七十八

欽定四庫全書

集部

石倉歷代詩選卷四百

七十九至  
八十一

詳校官石中允臣薩敏

侍讀臣孫球覆勘

總校官進士臣朱 銓

校對官庶子臣鄒奕孝

謄錄監生臣邑文訓

欽定四庫全書

石倉歷代詩選卷四百七十九

明 曹學佺 編

明詩次集一百十二

張邦奇

字常甫  
鄞縣人

奇遇

湛湛湖中水濯濯明葉葉關關對鳴鳩洋洋雙鯉魚步  
屨隨薰風欲去還躊躇須臾兩玉童飄飄來太虛授我

以丹砂啟我以靈樞渺然殊自失便欲登雲車萬物各有適悟徹焉所拘遊方遺外內寧須別故廬

簡徐子華太史

西北危堂構飛甍薄雲繡戶瑤房櫳雙燕來遊遨燕飛何涎涎奇音振林臯銜泥殊未已秋風尾脩脩尾脩何足歎去去傷徒勞風雨日夜急嗚呼怨漂搖歛翼蓬蒿下舉頭雲漢遙安得逢陽春雙飛完故巢

迎春

日月遞升降陰陽互推移陰陽各異致平均迺其歸君

看至賸裏象數無偏奇凝寒既以極再再生春暉庶形  
自終始誰能測其機蒼蒼不自言知天一何希

君子先立身達人貴知志勲名照千古事業在未試君  
看梁父吟已有殷周思條風發青陽生態正幽閔當其  
爛熳時已復非春意玉不生璞中誰明卞和氏

秋懷

生來不飲酒一酌已深醉況茲秋夜長氣清不成寐庭  
柯欲凋黃野草忽改翠藤蔓空百尋迎風見輕脆烏獲

輕千鈞首陽甘困悴苟非松柏性何以禦寒歲

樓外鵲巢始成

當樓烏桕樹高可五丈餘乾鵲來經營晨夕者拮据不  
待施斧鑿又不事杗樞驚飈萬木撼孤懸常宴如歸棲  
何疆疆戢左右復舒豈徒睦中冓亦以防外虞宇宙萬  
夥類物物各有居蕩子行不返使我淚盈裾

苦雨

孟夏乃淫雨朱光轉淒其出門泥淖深平疇漫成池雨



龍一離窟癡雲挾遨嬉淫淫翳空下滔滔無厭期靈湫  
寄大頂蛭螾鳴其涯風波倘失據龜艤當告誰梭懸雖  
待奮魚服終堪疑吁嗟望歲心閔閔誰能知

感興二首

臯夔昔遭際賡歌切卿雲日月懸高名丘山比崇勲光  
華旦復旦解慍流南薰生世苟不遇湮淪復誰云據梧  
南山下高槐覆青芸河清諒堪俟鳴鳥吾其聞

明王錄忠良鼎餗酬明德世運一以遷有時榮藿食藿

食非所榮清修表孤特如何眯目子勢利紛相射緹繒  
空十重卞璞委荆棘矯矯皇甫規超然分玉石呼卿問  
鴈門躡履迎縫掖

下峽

乘桴下三峽山水分崢嶸支危攬虎豹逐駛奔蛟鯨灘  
聲混晴雨峰影淆晦明不見星月光但聞猿狖聲迢迢  
甬東路淒淒湘水情庭闈屬遙想魚鴈久沉冥緬懷易  
播人古道今誰并

十一月四日甲子泊桴松滋阻風雨

投沙既十載署蜀將再期嚴揚久冥冥岷峨徒嶽嶽長  
使歡愛隔迥與初心違戒舟黃陵灘繫桴枝江湄暮雨  
昏巫峽迴颿掣長旗篷漏妨夕寢薪窮罷晨炊豈疑世  
相棄實畏天方憐救廬鄞江上遺編堪復釐歲月未云  
暮義農應可期

雲溪道中

披星雲溪道悠悠向巴陵荒榛牽我幃寒風吹我纓憶

昨初降霜奄忽成堅冰朱陽閔玄陰百卉俱已零陽春  
何邈悠感歎徒相仍

次惟靜叔韻

茅堂對東壁遠天明黛額渺然思丹砂何勞歌白石岍  
柳生微風池荷弄圓碧中庭閒無人明月暫嘉客招邀  
未成眠對酒忽心惕焉得假流光乘之登太液

雨後過東鄉即事

盆浦收夜雷老龍仍卧矣雨色生夏寒晨風薄羅綺攜

舟向遠山村店類塵市波恬若鋪席倚篷如隱几濯濯  
江柳長森森塚松穉新苗刺平疇麥秀曠盈視樹覆川  
更幽鳥呼雲欲起鳬鷺自浮沉岡巒漫推倚憶昨遊全  
荆歲馳千萬里衡山五方嶽洞庭天下水吾鄉此山川  
小大非倫擬幽事亦不稀觸目總玄理滄溟在東南茫  
洋大無比有興欲乘桴誰為由也喜

贈嵩渚

燕京昔多難遊子悲無依驚飈亂雲物千里何悽悽歡

言會知已知已各有懷促席不敢道燈燭寒無輝嫋嫋  
洞庭風飄飄吹客衣悵望蒼梧雲泣別雙明妃

送牛西塘太常致仕

風塵二十載睽離一何多會合今幾日臨岐將奈何相  
知既以晚相去忽以遠飛雲澗水西望望心悽惋沉沙  
雙鷗鵠牛斗栖精輝子其寧爾心親交良不稀

送張蒙泉上舍還天台

寒林曉色靜遊子信南征紋峰漾晴彩疏松暢鴻聲別

家既二載歸笥惟一經瞻雲北都思倚門南國情知子  
不可留執手心怵怵天台控三島石脈通四明況復鴈  
蕩山崢嶸連赤城將呼赤松子并拉安期生太宇月為  
燭天衢雲作輶相期弄瀑布周遊下蓬瀛

舟次潞河讀姚吏部贈別之作

朝辭國都門夕洱西河節悠悠碧霄間逝矣黃金闕君  
恩如海深十年脫吾褐肉食分大官玉堂置清列涓埃  
曾未傾瞬息遠離別金紉非我榮湖山非世悅人生各

有懷欲吐難為說懷哉故人心鑑我如秋月

送張賢萃尹豐邑二首

與君昔少年展步凌浮埃于今十五載中路徘徊慷  
慨論平生一飲傾千壘他時動相憶夜月臨秦臺

秦臺久不雨黃塵何漠漠我昔經其隈東瞻淚盈掬浮  
雲正南征赤地看優渥寒當雨之衣饑當雨之粟

詠懷

昨登武當峰超然並箕斗因之得大觀藩籬忽而剖吾



生本無涯所貴心不疚跼蹐祇自勞紛華竟何有風生  
越鍊紋雨空明鏡垢已矣歸去來毋使心常哀

八隆山

雲山久相違忽見令心悅況茲春已深兼值雨初歇岡  
巒翠欲流蒲柳柔堪結蒼松掩曖間行行閱香雪

題殷近夫扇面

愛茲手中扇皎皎冰玉姿清風動愈出不受緇塵欺與  
物本無係卷舒惟所宜君看大化運開闔亦有時萬類

盈其間誰非息相吹陰陽互消長乘化詎能違清秋  
嗟淫雨涼颼颼然來棄置莫復怨春陽豈無期

輓楊總兵

邊關昔日施長纓  
璽書幾度褒忠精  
陰山獨履漢家蹟  
匈奴舊識驃姚名  
暫辭金闕下江漢  
三千徒御皆無聲  
杖劍行期靖郴嶺  
數竒已恨同陰陵  
湖南霰雪日夜零  
旅魂不化寒雲凝  
安得壯士寧神京  
悵望霄漢空沾膺

鄖溪發舟追悼汪黃三公不及

四月雨過雲滿溪驛吏送酒不盈卮青山迢迢碧樹低  
獨立船頭沙鳥啼清風故人會面稀四載湖湘悲仳離  
竭來邂逅天之涯對酒復悞尚書期李郭聲名四海馳  
仙舟不共令人嗤盤溪水急去如飛我欲追君君不知

懷陳宗望

故人西向吳山阿幾度歸來不我過席間函丈久違問  
夙昔志業今如何如今仲蔚蓬蒿裏夜相尋渡溪水  
覺來起視明月光宛在何方水中沚

題松下攜琴圖

碧山悠悠高插天  
盡日松風鼓天籟  
造物以我為知音  
許我山中獨行邁  
我亦攜琴欲和之  
此心已寄浮塵外  
聾俗繁音恐不聞  
天地無聲亦應解

一塵不到軒歌

出門便覺塵埋頭  
如何有許清絕同  
丹丘簾櫳花開日  
秀朗惟有月向中  
庭流君心淡如水  
有脚不踐名利輶  
青絲垂門俗轍掃  
日賦百篇酣數甌  
嗟予誤落塵網中

十五年來不相訪恐溷君家庭院之清幽  
胃中丘壑亦不少顛毛未改簪先抽  
夏槐屯雲湖水綠早晚欲榜沙棠舟

翡翠圖

子臧日夜求珍羽輕身誤向黃廬渚  
天孫衣我何太奇每落人間不知處  
水遠山長煙霧銷碧霄回首思輕舉  
飄然謝却五陵兒白玉樓高明月曙

覽翠樓

樓前雨過塵如掃翠屏面面澄懷抱老檜長松凍不凋  
下廼安期布瑤草光流銀漢映欲空氣合秋旻青未了  
浮雲萬點去無踪白鷺一行飛更好

界山驛遲同盟不至

下青山兮步徐徐山禽百轉春日西凌高睇遠宿有期  
青牛白馬來何遲山磴盤迴不可極直下山根竚孤驛  
落花滿溪不見人千里百里空山色

蟠龍山

登蟠龍分高絕塵十轉百轉回回新小橋巖壑迸流水  
中有石室居仙人斜陽在樹白鶴鳴長峰短峰殊晦明  
須臾洞口陰風起吹作瑤空飛練聲

小寒食綿州同兵備憲副曾鳳陂登春酣亭

春風吹上春酣亭江山圖畫開新晴尊前柳花如雪舞  
樹杪淑氣催鶯聲憶昨亭空人嘆息凋盡芙蓉秋水碧  
使君一日下綿州遂有樓臺高百尺我亦明山舊隱淪  
歇馬溪頭問春色一盃破盡寒食寒似醉繁花露濃夕

曾公曾公本英志見汝先朝幾封事近日談玄復有神  
聽之動我凌雲思涪江淨洗白鷗心柱史隱動青牛氣  
何心區區懷故山此中亦有君平肆

靈谷

君不見鴈宕盤紆東海壖西有靈谷吐納千峰萬壑之  
雲煙平疇黍稷鬱蒼玉曲澗松篁鳴綺絃谷中主人雅  
高尚築室讀書多歲年客來煮茗坐深夜共訝清風明  
月由來偏我今白髮厭塵鞅幾迴夢落仙巖泉終當買



舟攜酒問幽勝日夕與子相盤旋

題畫

汀草初落汀花淨白日西風濯明鏡翠房佳實秋可憐  
兩兩文禽適情性吁嗟飛燕空涎涎啄矢深宮何足羨  
靈龜出淖輒刻腹清廟青黃却災木微生渺渺天悠悠  
眼底安危憑相攸君不見明月高寒白玉樓羽衣不動  
香塵流

鳩性愛雨花愛晴同倚東風不同情春光二月濃於酒

雙鳩醉寐不復鳴雙鳩不鳴花相語無令鳩醒教天雨

送呂畫士歸四明

樂愚孫子雙眼青下筆萬頃雲霞生  
竭來京華未幾日  
十家九家花鳥明薰風別我欲歸去我亦馳情入煙霧  
百幅生綃一壺酒期爾琅玕最深處

送林郡侯

秋夜悠悠殊未已月光流入床帷裏  
狂飈驚亂絡幃聲  
起拂煙埃步階屺衆星歷歷如可攀欲扣天闕愁萬里

見說支磯有路通便欲倒瀉銀河水丈夫意氣貴相期  
英豪海內今能幾仲蔚門前草已深君歸巖穴何時起

閱耕圖

春雨肥東菑春風吹短褐一犁但使衣食充百畝長遺  
子孫活君不見扣角歌聲暫歇他日逢時作伊葛

課讀圖

白日扃重門書聲徹林木先生謝政早歸田手把經書  
課兒讀君不見陳太丘但貽穀世世朱輪與華轂

雪夜渡彭蠡

渡彭蠡兮風蕭蕭大孤小孤寒雲飄水晶琢就萬峰骨  
梅玉點破千林梢漁舟遠宿火明滅野鶴不鳴天寂寥  
瑤京十二樓中月應照仙人吹碧簫

雲安仙客行

放舟下魚復勢與蛟龍爭緯繡雲搖三峽影微茫月照  
萬川城可憐萬里飄蓬客蒼苔露冷東山石見說仙翁  
此結廬暫向雲陽停掛席是時邊關豺虎驚朔風正攪

黃沙磧翁昔威靈遼海間今皇拊髀興歎息問翁翁不  
言舉觴視遼天願續扶嘉隱高歌郭子篇青燈白髮照  
奇骨永夜玄談真夙緣五峰拔秀出浮壺百壺雅致忘  
高年君不見蓋世英雄固陵道只今但見虞姬草又不  
見揮金買賦悲長門時違屏棄如孤豚風塵廿載無寧  
處黃鵠乾坤成再舉一醉翁家麴米春江臯細灑如酥  
雨

題南渠畫圖

南渠先生雙眼青未老拂衣歸赤城精廬巖谷軼浮壻  
擬結詩社誰為盟朝來放鶴翬紫冥邀取海上安期生  
相逢一笑開楸枰碧山幽幽溪水聲山翁無事投樵斧  
觀棊未竟柯先腐今古推移了不知誰問劬勲女媧土  
南渠先生好胸臆況復林巒遍仙蹟漫欲相從會有時  
為我豫拂松間石

題扇面圖贈且翁叔

金莢雪竇高入雲西有萬頃田畝畝下頭庄邊香稻熟

風景依稀如鹿門小舟棹入焚修橋釣絲搖曳風蕭蕭  
槎湖新水綠如酒擬築糟丘千仞高

送毛巡徵之任平圃

禁城風暖花欲然馬蹄急蹴雲霞穿黃金枝下綠尊倒  
遙望嶺南春可憐嶺南物色紛華彩花竹四時長不改  
一別何當萬里心幾欲乘槎泛溟海

郊齋次久菴宗伯韻

晝永嚴無斃庭虛戒有臨青陽新歲德精意格天心織

月春垣淨疎星曙閣沉鑾輿肅明發瞻望感微吟

九日院宿

玉署逢重九秋花傍苑牆天涯來弟姪客底似家鄉  
槁葉池魚響深松海鶴藏院虛宮漏永趺坐月微茫

送貳守張君之任開州

大任殘雪裏風物正淒淒目送孤鴻去行看五馬齊  
對床懷玉署揮鋏下金隄赤子憑留計青雲自此梯

和人宿碧雲寺之作



傍榻爐煙裊穿巖落照微溪晴雙鳥度巖暝一僧歸雲  
臥衣裳冷天空筆翰飛夢醒鐘磬發蕉鹿是邪非

送李巨川

高蹤不可及羸馬過溪橋欲別青山暮相看白髮饒斷  
煙橫遠浦急雨亂春潮望望仙旌盡鳥鳴雲樹遙

湘潭道中

自古有英皇空勞客興長亂雲迷楚堞寒竹照清湘水  
面拖冰老松頭戴雪強冥鴻霄漢物感汝到衡陽

冬日雜詠

雲白蒹葭冷山亭盡日幽百年雙鬢改萬古一塵流  
隴樹知今臘籬花誤昨秋獨醒誰是侶湖上片峰秋  
落葉打尊盞空山酒自波九歌淒宋玉三易老田何赤  
岬疎楊柳高檐響薜蘿歲寒心想絕朋舊已無多

草枯連野曠牛飽背童歸獨鶻饑偏厲孤雲凍不飛松  
風哀澗玉苔石曳寒衣霜白鳴鴻遠潭光濺竹扉  
好峰三十六箇箇月明中潮落半江蘆天空海外鐘桂

庭寒積翠楓澗暖流紅白石吾垂老桑弧感射蓬

臨清發舟沿途遲陸儼山不至

旅遇頻相失雲飛自遠山長疑隱汀曲渾似隔塵寰水  
鳥衝沙際川雲逗席間歡娛莫終負頭髮兩俱斑

出濟寧東李主簿

濟水炎蒸日吳船此再經長堤萬柳碧平野數峰青往  
事悲何極塵途鬢已星沿流人忽遠涼月墮醅醺

夷陵山行至九灣絕糧

路險仍遭雨人疲又絕糧山花空的歷我馬自玄黃草  
屋家家破秋田處處傷昔年羈宦者青史著歐陽

秋日孟有涯都憲東沙儀部宗叔過予分韻詠

白菊

晚色靜籬落澄空明素芳寒銷銀燭影清奪劍鋒霜十  
載驚雙鬢三秋共一觴出門星月淡岐路總相忘

贈何積夫昆弟

君家好兄弟秋水出芙蓉故國一相見春風千樹春溪

晴雲隔寺山靜月流鐘短閣厭厭夜荆花入座穠

寒食懷梁竹村先生

仙翁渺何處江水不容舫酒詫揚雄薄詩催杜甫豪清  
湘動雲竹赤堇耀蘭皋疎雨歇寒食春空孤巘高

渡楊子江

大江流不盡此日一來過更欲登臨去其如感慨何清  
尊延勝景遠岫列澄波長嘯懷今古乾坤幾不磨

述懷答東田弟

六十不歸去八年空及瓜何時觴北渚陪汝奕東沙仙  
構須依竹吾廬亦寄槎賡吟猶有日棠棣正數華

次孟有涯韻

陰雲解薄暮澤國銷煩蒸屋舫鏡中出月輪屏外升玉  
管淒鳳竹金風厲虬藤星河如有意洽此良宵朋

送裘景文妹丈還

壁水春回處相逢瀚海郎風姿渾玉雪談笑盡文章晝  
永頻更僕宵寒或對床悲歡懷往事居起及高堂放鶴

青雲閣呼僧翠竹房層臺臨象緯絕磴俯鸞鳳草長槎  
潭碧煙銷越樹蒼無由逐君去翹首鴈成行

送林進士使還

長江不可極歲晏遠行舟雪煢青山館天空黃鶴樓風  
情今道侶詞賦古名流玉質懷永映瓊筵呬白浮九霄  
看使節萬里念宸遊欲寫羈臣思憑君達冕旒

還葬涇王奉命之天壽山題主

看山有興出城難此日公餘得縱觀亭館緒風淒鶴馭

林巒佳氣謾龍蟠孤松絕頂凌秋急片月中庭鏤樹寒  
藩室總霑天寵渥睿靈長倚帝居安

春日遊南城

逶迤禦宿遶層闌松檟陰陰紫殿寒竹引井泉通翠釜  
鳥銜林蕊下瑤壇五雲挾日河山麗六御行春雨露寬  
翹首幽風亭咫尺詠歌天保及斯干

陪祀泰陵

憶抱烏號三十年園陵今夕倍淒然庭華有淚山經雨



林木無聲月在天燈燭上搖銀漢影衣冠齊染玉爐煙  
龍輿彷彿祥雲裏春滿乾坤聖澤綿

七月廿二日翰林東署邀儼山後渠二宮詹賞  
蓮疊禮部來玉亭韻

方塘幽勝玉河邊亭午香霏石鏡蓮乍喜客來收澍雨  
却教花妒領風煙容輝淡蕩湘江珮風采逍遙鶴上仙  
斜日未須輕別去會看清影綠尊前

水花搖影掖垣邊白髮相看詫炬蓮太液池涵金掌露

若耶溪遶北扉煙人間偶識新粧面天上重回舊謫仙  
四十年來稀會客百壺須盡晚香前

孫季泉太史奉母太夫人南歸詩以贈之

棣花樓閣五雲城王母親將下玉京恩露遠分瀛海潤  
文星先注越山明河經宿雨仙舟駛簾捲春風舞袖輕  
我亦有親歸未得薊門南望不勝情

和介溪宗伯遊西山諸寺之作

石峰層翠倚蒼天上客重臨更洗然祇樹盡含仙掌露

曇花齊帶玉樓煙寒窗聽偈燈頻剪幽閣談詩席屢前一顧邊闕鈴杳靜卿雲祥靄自堯天

元夕未齋宮保招飲張燈作樂

次汝湖翰長韻

今夕何夕月當戶尊前對此羣仙人長歌忽到刻漏盡痛飲不知天地春嗟來羨門爾吾侶欲往蓬山誰作隣壁殿星橋有深慨開簾且視梅花新

赴未齋宮保會賞梨花

侍罷宸遊興不單更攜仙侶玉堂寒華燈竹葉勞相勸

春院梨花故未殘  
月淡煙雲橫遠漢  
鶴憐清影失旃檀  
百年知己俱頭白  
對景何妨一盡歡

次林小泉大司空得請致仕因以為贈

忽聞溫旨下虞廷  
老覺人間好事并  
稅駕煙霄真志足  
杖藜山郭尚身輕  
勲名已紹家庭舊  
詩句仍傳里社清  
八十潞公猶戀闕  
佇看鱗錦更承明

喜雪

夜半窗櫺疑曙色  
起看門外雪封溝  
三山有鶴棲瓊樹

九陌無塵上玉樓  
光借鹽盆雄獸勢  
浪平銀海伏鰲頭  
豐穰有瑞壺觴合  
莫遣詩遲太白浮

和桂翁寄王九潭編修

玉笋仙班久虛寂  
松喬故戀鄉溪山  
滄江又見木葉下  
塵世獨憐秋鶴閒  
已向層霄瞻鵠舉  
況逢晴日遶龍顏  
人生有才終自遇  
何必翠微長掩關

送潘憲伯入蜀

相見京華感興長  
菊花鴻影又離觴  
乍歸黔粵如新客

重入蜀渝似故鄉  
晝日轉輝袍  
錦露秋風偏凜節  
旄霜征途莫歎江湖遠  
猶有知音在廟廊

秋日過西山

聞說西山幾屬懷  
偶因王事入山來  
醪醕梵閣傾瓶吸  
桔槔農家過屋堆  
溪水曲依深樹轉  
石橋斜指翠屏開  
徘徊落日有餘興  
林壑風清月滿臺

張都閫廷瑞盆池蓮高丈許人以為得子之兆  
忽見中庭十大花華峰何事落三巴  
若耶溪上人初到

濯錦橋西月未斜  
露冷孤堇飡玉屑  
雲扶高蓋想金華  
雨香秋澹房房實  
仙種靈源更足誇

介溪庭院菊花盛  
開兼有葵花一本  
以所和儼  
山詩招賞次韻

帝城西畔秩宗家  
深院秋開種種花  
向日未同羣卉落  
傲霜猶見一枝斜  
觴行夜色寒紅玉  
窗掩幽香度碧紗  
珍重主翁歡賞洽  
愧無佳句答芳華

送沈大理錄囚桂林

桂水元戎初獻績  
潞河仙使正浮槎  
青春伴遡三湘月  
黃鳥催看五嶺花  
莫問貪殘狼子性  
最堪矜恤遠人家  
東吳桑梓重經地  
雲錦翩躚日未斜

送張石川銀臺致仕

幾聞清樾動吟哦  
暫喜冥鴻脫網羅  
天下名邦吳會好  
秋來明月洞庭多  
人情自古皆如此  
世路于今可若何  
把酒潞川空感慨  
未應昭代老巖阿

送陳錄事南歸吳



雞鳴閣上曾論秀金馬門前又見君  
燕谷別筵春對雨潞河仙舫曉衝雲  
風飄萬柳花如雪魚戲三江浪蹙紋  
歸去故園應動色一尊喬木坐清薰

送姑蘇馬鍊餅內翰考績之京

白鷺洲前生早涼相逢忽謾是離觴  
煙中孤鳥碧空盡江上片帆秋影長  
玉署文章應最績清朝甲第自傳芳  
儒官莫歎清閒甚萬古雲霄寄一忙

十二月二十日巡視內城有作

東南洲島類仙丘，城郭臨觀得勝遊。  
天外碧波紅日起，樹邊黃屋白雲流。  
半江晴色開鐘阜，萬戶炊煙傍石頭。  
極北河山瞻咫尺，絳霄宮裏玉宸旒。

送張遠之歸晉陵

霄漢輝聯伯仲間，強年何事遽求閒。  
渚清沙白片雲去，木落江空孤鶴還。  
風雨對床歡未畢，湖山歌帽興誰攀。  
請看璧水台垣近，飛夢應迴玉笋斑。

初夏過桃浦王宅感懷

十載京塵旅夢悠重來桃浦雪盈頭遶林風色酬花信  
帶雨秧針映麥秋短閣青燈悲舊事華筵急鼓沸新謳  
飛觴未盡東君意相送河橋月滿舟

登清涼山

坐俯虛亭萬木蒼清涼山上正清涼雲間鳥道通仙跡  
天際江流遶帝鄉且向佳辰陪燕賞莫將前古話興亡  
臺高不用風如許落帽君看有興狂

送嘉善朱良翰經歷之泗州衛

都城未幾接容輝忽向南天衣錦歸雲淡潞河秋片片  
雨收淮海月依依濠梁坐盼知魚樂泗水行歌縱鶴飛  
清世幕庭無一事覽山相對自忘機

八月十五日舜甫弟生日聞將至京述懷

聞說西來屬望頻況逢佳節又生辰深情不憚三千路  
樂事真娛九十親朋舫正沿何處月百壺先釀小堂春  
鳳城明日堽麓洽攜取金莖玉露新

甲辰春前一日同諸公登雨花臺趙鷺洲大參

留宴

東南佳麗此非常  
況復新晴酒滿觴  
煙柳萬家春動色  
雨花千剎午吹香  
天空海嶼孤雲沒  
風靜江沙匹練長  
愛煞鷺洲賢地主  
數愁無計駐斜陽

張水南學士置酒徐氏西園招予及諸公宴集

江郭名園幾度遊  
仍從仙侶賞高秋  
煙巒數點夕陽外  
鴻鴈一聲天盡頭  
斑竹林塘思帝子  
黃花籬落對浮丘  
主人賸蓄如泉酒  
試聽金絲入夜稠

登拜嶽亭

纔上高峰眼自醒  
雙鴻得意展秋翎  
雲中下見王喬舄  
樹裏平看傳說星  
影浸湘江窮地碧  
勢連衡嶽極天青  
古來聞道名如舊  
誰向懸厓費勒銘

秋日試太學諸生

碧山書院枕江流  
萬國英賢此息游  
好雨乍收三伏暑  
高槐先送六堂秋  
龍煙集處翻河漢  
蠶葉聲中動斗牛  
漫憶昔年雲錦段  
天孫親贈鳳池頭

送陸東川之官親藩兼省覲

相見京華纔幾句又看征騎逐紅塵  
煙花正拂春風細雲錦重霑雨露新  
瞻闕夢飛千里月上堂歡動百年親  
鳳凰山外盱江碧五夜銀潢映玉宸

正月十四日登木末亭

陰寒江左動兼旬此日晴探木末春  
歌遏流雲天萬里氣凌飛鳥酒千巡  
星橋碧殿歡何在舞柘傳柑事已陳  
風磴絕憐修竹裏夕陽禪刹更留賓

和費鍾石送弟詩

客鄉金玉許誰羣，忽謾江天鴈影分。  
夜榻不經三月雨，春船聊逐五湖雲。  
池塘碧草重回夢，瀛海銀魚豈浪焚。  
黃閣勲名家世物，眼中棠棣更華紛。

上巳日周玉巖司寇拉遊蔣山枉詩見惠次韻  
郊行長為簿書遲，勝友壺觴已翠微。  
夾路桃花迷入洞，傍溪鷗鳥憶臨沂。  
松陰坐久還移席，草色春深欲染衣。  
紅日下春湖水碧，石橋齊蹋彩霞歸。



送陶醫士歸彭澤

忽憶先人松菊園  
秋空獨鶴馭雲軒  
昔年金谷已無主  
今日柴桑猶有孫  
青龍白虎秘真訣  
黃帝素女通靈源  
匡廬吾欲拾瑤草  
幾度問君君不言

贈梓上人

昔日相逢俱少年  
重來應笑我華顛  
倚樓蒼壁霏霏雨  
覆院修簷漠漠煙  
銀箭銅壺催送酒  
竹爐巖竇巧分泉  
山深不解風波惡  
伏虎降龍任老禪

次韻寫懷

春雨蕭疎老紫荊  
曉田下溪自留耕  
林中菓熟呼兒摘  
谷口人來聽鶴迎  
江郭好風催月上海樓  
晴日看雲行  
關門令尹今誰是  
隨處青牛得避名

丹徒旅泊懷萬氏西溪

聞說西溪景趣賒  
美人相引入煙霞  
白雲山腹半藏竹  
青靄石橋深護花  
龕影夜堂舍利磬  
聲高閣飯胡麻  
大江回首今千里  
飛夢時時到九沙

滕陽元夕遇雪

滕陽館前值元夕同雲四野飛瓊花火城星橋未足數  
瑤臺玉宇真堪誇子房山頭赤松下項籍城南春草賒  
風薄重裘類輕葛眼中奈爾無衣家

九日臨清舟中

何處花開獨不見秋光亦自滿江臯客心惟愛故園好  
佳節不知人事勞簾外水聲迴曲浦煙中樹色遶荒壕  
憑誰欲覓登臨地落日青山空興豪

大雷山懷舊二首

十年重到大雷山，依舊鶯花白晝閒。  
細草遠連春澗綠，落梅時點客衣斑。  
流塵歲月人空憶，遶徑煙霏鶴未還。  
采遍蘭皋猶駐馬，夕陽何處水潺潺。

維舟村市踏平灘，纔到山中便改觀。  
一夜雨過鳴澗壑，半空雲墮失峰巒。  
人家有徑蒼苔滑，蕭寺無僧翠竹寒。  
此日故人千里隔，欲攀高頂望長安。

建壘禪寺逢聞美中讀書

白雲深處隱招提京國歸來暫息棲猶有餘春催布谷  
更無塵事感醯雞參差翠竹連深徑依約青山亂隔溪  
最喜故人能避俗夜窗還擬共然藜

遊慈谿清道觀

將尋仙跡野江濱解纜江潮捷有神修竹牆頭雲鬢石  
老松門外蘚封鱗路窮危磴渾忘俗山向深秋欲瘦人  
白髮洪厓終日笑為呼玄鶴下風塵

次王天宇東郊禪寺

絕憐佳會市城稀  
來看禪房竹映扉  
滿徑霜華僧獨對  
一天秋色鴈南歸  
牛山何用傷身老  
陶令真能悟昨非  
欲向澄江問消息  
可無人似謝玄暉

送學士賈先生出掌南翰

凝望仙舟興欲飛  
宦途蹤跡此行稀  
江東舊事推南史  
天上新恩自北扉  
路遠白雲春動色  
夢回清禁月流輝  
玉亭深處浮塵絕  
吟到青山願不違

雨後訪戴秉誠親丈

南河積雨漲成江閒放輕舟過野杠剡水風煙渾屬戴  
鹿門禾黍久淹龐過牆翠篠鳩呼獨滿徑蒼苔鷺下雙  
別去不知天欲暝醉看涼月倚西窗

西山溪隱菴題壁

似與青山夙有緣今來偏值日暄妍攀花誤觸松梢鶴  
呼茗頻供竹底泉主意濃時休問晷僧房幽處試聽禪  
春風細拂如茵草乘興何妨一醉眠

西中東張應辰

攜得雙柑空遠興黃鸝無語碧柯寒石橋芸閣客應臥  
苦雨酸風春欲闌狂飲直思江變酒豪吟長以籜為冠  
草深泥滑出門去人在比隣相見難

約過板橋未果東諸宗長

竹院尋僧阻舊要板橋東去路非遙塵封玉薤心先醉  
露冷金莖渴未消瀛海有人秋駕石秦樓何處夜吹簫  
火雲臺閣炎州地書遍窗前幾葉蕉

和桂州九日遊邵家園之作



前輩曾開後樂園秋郊時復見仙尊  
短筇疎樹葉迷徑  
流水夕陽花遶村復有笙簫供綺席  
不勞猿鶴報華軒  
太平元老紆籌畫佳節還同醉渥恩

寫懷

茆廬新構倚滄溟地域仍分織女星  
東去波光兼月白  
北來山色度江青  
碧溪道士春無夢黃鶴仙人舊有翎  
舟泛木蘭天不礙煙中鳬鴨水中萍

四月江臯雨乍晴方塘一畝鑑空明  
興來時復麾談麈

愁破無勞動酒兵  
柳外餘春鶯獨嘯  
花陰遲午鶴雙鳴  
太平風景村村樂  
閒看禾苗得意生

朝陽堂

朝陽堂外雨初晴  
中有仙郎作鳳鳴  
滿地黃花秋鴈影  
一簾涼月夜江聲  
青氈味合琴書古  
寶篆香吹枕簟清  
銀燭剔殘更漏永  
夢魂時復到承明

次韻答嚴介谿侍讀見懷之作

從別衡山有夢親  
孤懷何日向君陳  
秣陵城闕新承寵

甬水園廬舊食貧風雨晝驚南史筆煙花秋老北扉身  
應憐琪樹青陽節生傍陰厓不見春

晚渡湘潭陸行宿道國寺

荒塚累累壓板田長江初臘淨嵐煙臨涯雪屋明湘水  
薄暮風帆映楚天老竹叢中寒意劇亂巖通處月華穿  
霸橋風景宜相似空坐僧房憶賈仙

遊天竺

淡煙微雨冪蘇堤佳伴相攜任馬西花竹靜看人斷續

樓臺清映樹高低兩峰春氣催黃鳥九里松濤亂碧溪  
最是山僧知愛客夕陽渾欲住招提

夏日村居

巴川日夜苦離愁乞得歸來宿願酬遍插園蔬防舊客  
豫栽籬菊待清秋池亭坐愛清田鶴郊牧行牽甯戚牛  
一著荷衣心似水卧聽涼雨竹邊樓

風搖欹蔓響高簷裝裏殘書手自籤鳳管玉樓邀素月  
碧筒深樹遣朱炎東臯過雨施長屐南畝逢秋試短鎌

筮仕廿年家食半獨於山水性非廉

寶雲禪房遣興二首

年登四十兩歸田喜有工夫伴老禪  
愛月西樓簾盡捲  
貪涼北牖榻先懸  
茶煙併入香爐火  
竹影斜橫玉井泉  
長日閉門深徑底  
此中真與病軀便

微薰清晝款輕衫  
梵宇無聲意自緘  
開閣遠通天竺國  
浮槎歟見補陀巖  
狻猊座上琉璃影  
孔雀經邊白玉函  
世路只今荆棘滿  
寄身方外免鐫鑿

次韻答叔父見寄之作

塵心渾覺淡於禪  
石鼎春茶起自煎  
烏帶輕雲來灌木  
魚吹纖藻動幽泉  
子門舊德寧徒爾  
阮徑清風自灑然  
最想連枝多秀發  
月中移種定何年

出南旺湖見山

性僻耽詩興未闌  
獨辭金馬向江關  
他年定醉湘南景  
此地得看湖上山  
風際水花搖晚色  
夢中煙樹遶天顏  
長安十載成追憶  
今日瞻雲許暫還

蘭溪

雨餘新水減平沙  
吟倚篷窗玩物華  
翠草成茵迷柳色  
白巖如雪燦桃花  
雲飛鄂渚瞻親舍  
月照蘄陽艤使艖  
欲問玉臺山上事  
道陵歸去長春茶

黃梅道中

二月黃梅開碧桃  
使車東下轉忘勞  
鄉音漸與勾吳合  
山勢斜連建業高  
江上魚龍浮霽景  
煙中鳬鴨映芳艸  
幾年荆楚牢籠地  
應愧春風列俊髦

江南曲

青山曲曲轉江水近復遠  
指點叢草中此是陳宮苑  
地占織女星矯首牽牛渚  
長風開薄帷郎今在何許

送王石沙侍御按閩

清薰冠蓋下金門一騎青  
驄萬疊雲明到閩山正秋色  
玉簫吹向武夷君

次韻答東橋大司寇新營息園

花徑斜通宿雨香竹籬晴逗午雲涼  
博山煙盡日西下



惟見碧莎松影長

鍾石少司馬以所和桂洲苑中夜直紀事詩見

示次韻

遊魚吞墨子雲池老鶴驚翻玉露時秋盡幾盃桑落酒  
月明三唱竹枝詞

東弟

新構依稀綠野堂幾年辛苦累擔當憑君別作巢松計  
開徑斜通五柳塘

淮角樓

歷盡湖山興未降  
袁宏何處倚吟艘  
夜深淮角樓邊月  
直照東南楊子江

南旺

秋露熒熒沙渚明  
秋風嫋嫋波浪層  
蒹葭汀邊老漁父  
點火船頭初放罾

贈且翁叔

衡門瀟灑似陶家  
吟遍江湖兩鬢華  
五柳不禁風瑟瑟

盡輸秋色與黃花

東園添箇碧琅玕欲與西鄰老阮看  
喚取床頭新竹葉共酣明月五更寒

送李巨川

君去豪遊誰可同  
明山煙樹鑑湖風  
湘江愁客如昨日  
萬里蒼梧夕照中

白溪道中

十日春風迸草芽  
竹根尖笋列平沙  
巖巒立倚清溪瘦

上有孤梅橫數花

欲訪景文親執不果

西江望望似天涯  
欲訪求羊嬾問槎  
一榻午樓清夢醒  
春風吹老杜鵑花

北窗高卧圖

參餘蓮社枕孤琴  
免作人間苦熱吟  
不是翁家無六月  
日移松影北窗陰

和周約菴詠新荷

誰家庭院鬱清香風露九霄吹晚涼  
忽憶夜舒荷畔事雲光開曙到斜陽

金口書懷

宦情羈思水雲鄉翹首天閣路渺茫  
山鳥自鳴花自發滿船風雨度瀟湘

過巴陵遇風雪東蘆泉劉用熙

巴陵重繫木蘭船欲訪南城辟穀仙  
鳳管不知何處去滿天風雪暗蘆泉

醴陵望萍鄉感叔父

鳳凰山下醴泉清  
寒月依依傍楚城  
東望萍鄉纔咫尺  
不知更鼓尚分明

石倉歷代詩選卷四百七十九